



RESOLUCIÓN DA DIRECCIÓN XERAL DE PESCA, ACUICULTURA E INNOVACIÓN TECNOLÓXICA POLA QUE SE AUTORIZA CON CARÁCTER EXTRAORDINARIO A COLOCACIÓN DE ATA 50 CORDAS COLECTORAS MÁIS POR BATEA E O AUMENTO DA LONXITUDE DE CORDAS COLECTORAS ATA 12 METROS EN TODOS OS POLÍGONOS DE CULTIVO DE GALICIA.

ANTECEDENTES

1. O 10 de febreiro do 2023, FEMEX (FEDERACIÓN DE ASOCIACIÓNS DE MEXILLOEIROS) solicita autorización para adiantar o prazo na colocación de cordas colectoras así como para aumentar o seu número a 150 cordas por batea e a súa lonxitude a 12 metros.
2. O 23 de febreiro do 2023, solícitase informe aos membros da Comisión do Mexillón. Informan favorablemente formulando nalgúns casos as respectivas peticións individuais, as seguintes entidades: Sociedade Cooperativa de Mexilloeiros de Galicia Socomgal, Asociación de Mejilloneros "San Saturnino", Asociación de Mejilloneros Profesionales A' Marxa, Amegrove Soc. Cooperativa Galega. A Asociación Productores Mejilloneros Ria Nosa de Moaña e Organización de Productores de mejillón de Galicia "Opmega".

CONSIDERACIÓNS TÉCNICAS

Circunstancias excepcionais como os desprendementos de mexillón, escaseza de mexilla axeitada nas rochas na época hábil de recollida, a dependencia directa dos factores climatolóxicos nos desoves do mexillón así como a limitación das zonas para a extracción de semente de mexillón en banco natural levan consigo ter en consideración a petición do sector na ampliación do prazo para a colocación de cordas colectoras así como a modificación do seu número.

Estas mesmas circunstancias aconsellan a procura de experiencias no aprovisionamento de mexilla mediante a colocación de colectores máis longos no medio natural durante o proceso reprodutivo dos exemplares adultos.

Así mesmo a maior necesidade de semente debido a cambios nas demandas de mexillón de talla máis pequeno para o consumo en fresco favorecen a necesidade de buscar alternativas para que os bateeiros se poidan abastecer de semente de mexillón, para complementar á recollida en rocha e evitar unha dependencia desta.



De acordo con todo o indicado, **RESOLVO:**

Autorizar a colocación de ata 50 cordas colectoras máis por batea, así como o aumento da lonxitude das cordas colectoras ata os 12 metros en todos os polígonos de cultivo de Galicia, **baixo as seguintes condicións:**

1. As cordas colectoras poderán manterse na batea ata o 30.09.2023.

2. As cordas colectoras, que terán libre un dos seus extremos, deberán estar claramente identificadas mediante unha marca de cor vermella intensa, na súa parte superior, dunha lonxitude mínima de 30 cm que a diferencie perfectamente das cordas de engorde.

3. Comunicación previa da colocación das cordas colectoras

Os concesionarios deberán comunicalo con antelación suficiente, indicando o nome do viveiro e a súa localización, á Subdirección Xeral de Acuicultura, Dirección Xeral de Pesca, Acuicultura e Innovación Tecnolóxica da Consellería do Mar. A comunicación poderá ser realizada a través do modelo PR004 ou a través do correo electrónico servizo.innovación.acuicultura.cmr@xunta.gal.

4. Seguimento da recollida de semente de mexillón nas cordas colectoras

Os concesionarios deben realizar a declaración de recollida de semente de mexillón nas cordas colectoras. A Consellería do Mar ten establecido como ferramenta de comunicación entre os concesionarios de viveiros e a Administración, a declaración de captación de semente de mexillón a través da aplicación informática de expedición de documentos. A ferramenta web permite a declaración de obtención de semente de mexillón en cordas colectoras, a cal poderase utilizar dende diferentes dispositivos, tanto dende unha aplicación telemática como dende o TICPESC ou dende o móbil (aplicación MOVVIC). Os concesionarios de viveiros deberán achegar a seguinte información:

O nome do viveiro, a súa localización, a data de colocación de ditas cordas, o número de colectores totais no viveiro, a cantidade de semente de mexillón recollida por corda colectora, o tamaño medio e o viveiro de destino da dita semente.

En todo caso, para os efectos de realizar o correspondente seguimento técnico, os titulares dos viveiros deben colaborar co persoal da Consellería do Mar facilitándolles a información que lles sexa requirida.





Contra a presente resolución, que non pon fin á vía administrativa, as persoas interesadas poderán interpoñer recurso de alzada ante a conselleira do Mar, no prazo dun mes contado a partir do día seguinte ao da súa notificación, de conformidade co disposto nos artigos 121 e 122 da Lei 39/2015, do 1 de outubro, do procedemento administrativo común das Administracións Públicas.

Antonio Basanta Fernández

Director xeral de Pesca, Acuicultura e Innovación Tecnolóxica

